



Sabtu, 14 September 2024

**Ogen: 1 Korinti 13:4-7**



**"LIT SIMEHULI BAS KERINANA"**



**K**iniseran ras si mesui asa bancina isilahken kerina jelma. Labo meriah ukurta reh percuban i bas geluh enda, nta pe rusur-usur icedai kalak ukurta. Tapi uga adina si ncedai e labo kalak sideban? Kalak si ndeher ras kita, kalak si itandai kita, si keleng kal ateta, janah siarapken ia banci jadi teman bas kerina paksa, tapi icedaina ukurta. Uga nge ndia perbahanenta man bana? Perban cedana ate banci bene kekelengen e, banci lanai kita merhat erkuan ras ia, banci salih jadi dendam ras trauma si mbages, banci lanai merhat kita jumpa pe.

Rasul Paulus ngajari kita kerna cara si mbaru i bas kekelengen. Man kalak Korinti iajarina perbahan sedekah enda kalak e ngangkai kekelengen labo perlu. Si penting bas ia e me kai si teridah e me: kehebaten, kesuksesen, karunia-karunia si mbelin. Tapi reh nina Paulus, labo lit ertina kehebaten e adi la lit kekelengen si tuhu-tuhu. Keleng ate si tuhu e la ialamatkan man kalak si sempurna. Keleng ate si murni e me desken keleng ate Kristus. Kekelengen Kristus e ngkelengi si la dorek ikelengi, ngalemi amin gia la teralemi, tetap tek amin gia ruluh-ulih ikecewaken. Erpengarapen amin gia siteridah gundari tempa-tempa la lit si man arapen.

Kalak si dehera e, teman geluh, keluarga, sahabat, serayanta banci jadi labo kalak serta si megati ncedai pusuh ukurta. Erpalasken kata Rasul Paulus e, iajarina kita nuduhken biak Kristus i tengah-tengah kegeluhenta. Adi lit kekelengen Kristus e i bas kita, sipersilahang biak jahat bas pusuh, nggit kita engkelengi alu bujur, ngalemi rusur-usur dengen tek kita maka lit nge si mehuli i bas kerinana. Tuhan labo tunduh, iperdiatekenna nge kita seh ku pusuh si mbagesna kal. IetehNa kai si mehuli si atena iberekenNa banta. Labo lit hakta erbalas man kalak si erbahan ceda pusuh. Tuhan ngenca lit hakNa erbalas. Man banta tetap icidahkenNa kekelengenNa. Ula bera ukurta, kiniseran ras kinisuin e sidalani radu ras Tuhan ras pengajarenNa, teguna kita bas dalamNa.